

# Doihcuengqingj Riuzdoengh Henzguek—— “Sam Beixnuengx Ranz Veiz” GienSouj 38 Bi

“Beixnuengx, haemh neix denyingj ndeiawj bw! Gwn caeuz liux le ma yawj denyingj……” Veiz Goh gaemhwnj aen vahdoengz, yungh Vahcuengh lwnh duenh denyingj haemh neix yaek cuengq ndeu gonq, gij sing hemq de youq ndaw bya rwenz. Mbouj geijlai nanz, vunzmbanj yaep ndeu song boux yaep ndeu sam boux fwngz ndeu gaem dienhdengz, fwngz ndeu riuj daengqiq lienzdaemh madaengz giz cuengq denyingj.

Veiz Goh dwg vunz Bouxcuengh, de youq aendoih cuengq denyingj gyaез lwgminz souj maenh henzguk Gvangjsih Cungzcoj Si Ningzmingz Yen Swlang Yangh guh duicangj. 38 bi gvaqdaej, de caeuq godaih Veiz Cungh, go'neih Veiz Gyangh vih doengh aen mbanj, hagdangz cungh-yoz, hagdangz siujyoz henzguk cuengqingj gak loh denyingj 1.4 fanh lai baez, byaij loh gyonj hwnjdaej miz baenz 26 fanh lai goengleix, leih daengz vunz lai 160 fanh lai vunzbaez.

## 38 bi youq henzguk byaij cuengq denyingj

Mboengqneix, gicej bae daengz aen ranzgaeuq geij beixnuengx ranz Veiz, aen bolingq mwhhaenx vih hawj vunz lai yawj denyingj ngaih di ndeu lij youq, gij gicaiz cuengq denyingj baijcuengq youq gok ciengz, gwnz faqciengz nem dwk gij giva daengx bi baenzlawz cuengq denyingj, seizlawz bae aen mbanj lawz, cuengq geijlai baez, raiz okdaej ndaej cingcing cujcu, bi ndeu roengzdaej cuengq 300 baez baedauq.

Ngoenz haenx vaiqhaemh, Veiz Goh hai cimienhbau riengz lohbya gumzgamx ngutngeuj doxhwnj, haici cibgeij goengleix bae daengz Mbanj-canggih Ganh'ai Cunh. Miz boux-gagnyienh bang, Vangz Goh youh gvenq youh sug daeh gicaiz roengz ci, vut diuzcag, hoij mbaw muq denyingj, gaq cuengqingjgih……Mbanj ndaw rungh ndaw bya caemrwg yaepyet couh goenjhuu lo.

Doenghbaez haujlai mbanj henzguk mbouj doeng loh, mbouj doeng dien, yawj baez denyingj ndeu caen mbouj ngaih saekdi. Veiz Goh lwnh gicej, sam beixnuengx de mwh lij iq cungj maij yawj denyingj, hoeng mwhhaenx ndaw mbanj mbouj miz denyingjyen, yawj baez denyingj ndeu aeu byaij lohbya 3 aen lai cungdaez.

Bi 1981, miz daxboh daiq, gyoengqde gizneix rom di ndeu gizhaenx ciq di ndeu, dauqdaej gyonj ndaej 3700 maenz cien, cawx ma aen cuengqingjgih cuengq denyingj 16 hauzmij ndeu caeuq gij gicaiz boiqdauq de, gaplaeb baenz aendoih cuengq denyingj Swlang. Ndown youq baihnaj aen ranzgaeuq, Veiz Cungh naeuz: “Dou gaijcauh gizneix baenz aen denyingjyen iq ndeu. Mbaw biuq ndeu hauz cien ndeu, bouxdangbing caeuq bouxgeq gadog yawj couh mbouj



▲Bae Mbanjyauz cuengq denyingj.

aeu cien. Moix baez cuengq denyingj gizneix bouxyawj cungj rim liux. 《Didau Can》《Doihyouzgiz Dietloh》《Saulinzsw》doenghgi denyingj gaeuq neix lienzdaemh cuengq haujlai baez, vunz lai cungj yawj mbouj mbwq.”

Bakdou ranz miz denyingjyen lo, neix bienqbaenz “saehgienhhuong” hawj vunz dangdieg gingdoengh haujlai nanz. Veiz Gyangh lwnh gicej, doeklaeng vih hawj gij vunz lai youq mbanj bien'gyae mbouj yungh ok mbanj couh ndaej yawj denyingj, gyoengqde haindu hawj denyingjyen bienqbaenz denyingjyen riuzdoengh, rag gicaiz haeu cunh haeu mbanj, dawz mbaw muq denyingj hoij baedaengz baihnaj ranz, raeb laeng ranz vunzmbanj.

Byamujgungh fwn doek le fatok gij heiqhom faex nywj. Bineix dwg Cungguk moq laebbaenz 70 hopbi, aendoih cuengq denyingj daegdaengq senjaeu《Daih nieb Laeb Guek》. Youq mwh cuengq cingqbienq gaxgonq, lij boqcuengq doenghgi benqdinj baenz-lawz ndaem ywdoj, gyaudoeng ancienz, gvansim gyaезhoh lwgnyez louz mbanj dem. Haemh haenx, 20 lai boux vunz Yauzcuz ndang daenj buhvaq minzcuz bonjfaenh doxcaez humx naengh youq yawj denyingj. Yienznaeuz gyanhaemh ndaw bya lij miz di nit ndeu, hoeng vunz lai sim gig raauj.

## Aen sim mwhnduj fugsah yinzminz mbouj gaij

Gij hongdawz gyaudoeng aendoih cuengq denyingj sam beixnuengx ranz Veiz daj mwhnduj dwg soufuz dohlahgih daengz cisamloek, liux daengz cimienhbau; aen cuengqingj-gih aeu ma cuengq denyingj haenx daj aen gyaubhengih yiengh gaeuq naekcaem daengz aen suswgi dan yungh aen U banz ndeu couh cuengq ndaej haenx……Riengz hongdawz gyaudoeng, gicaiz cuengqingj ngoenz

ndei gvaq ngoenz, gij denyingj mbouj doengz loh hix ngoenz lai gvaq ngoenz, lij boqcuengq haujlai benqdinj cien-monz senhconz gejgangj gvendaengz gij cwngcwz aen dangj, gohgi nungzyez, gij daezsingj cianh dem.

Aendoih cuengq denyingj lij cauxok gihvei hawj bouxcoz doxcomz gangj cingz dem. Youq gwnz haw Swlang Yangh, Veiz Yihbingz, Suh Cunhhoz song gvanbaz neix nyaengq youq dajleix gij seng'eiq ndaw bouq. “Dou yienz laiz mbouj dox roxnaj. Bi 1988 aendoih cuengq denyingj bae aen mbanj de youq haenx cuengq denyingj, gou couh buet gvaqbae yawj. Baebae dauqdaej de couh bienqbaenz baz gou lo.” Veiz Yihbingz gangj hwnj gij cingzgingj bi haenx naj riunyumnyum, “Bi 2002 dou lingx mbaw cingq gezvwnh, seizneix gaeng miz song boux lwg lo.”

Boux siveij suhgi Cungzcoj Si naeuz, aendoih cuengq denyingj geij beixnuengx ranz Veiz yungh song aen ga bae dag gij byabya raemxraemx henzguk, hawj gij ndwenngoenz vwnzva cingsaenz vunz lai henzguk bienq lai haujlai, haigvangq diuz miengloh vunz lai henzguk rox cwngcwz guekgya, hag gisuz senhcin, hawj vunz lai henzguk engq lai gagrox bae hensouj henzguk, gyamaenh henzguk.

## Bouxcienzboq vwnzva roengzrag henzguk

“Vunz lai daezok iugouz, dou cungj yungh daengxheij goengrengz bae guhdaengz.” Veiz Goh naeuz, “Miz boux coz ndeu ma ra gou gvaq, naeuz daxmeh de ninz youq gwnz congz doengh mbouj ndaej, hoeng siengj yawj denyingj dangqmaz. Ndigah gou couh baedaengz ranz de, cuengq baez denyingj ndeu hawj song ranz vunz.”

“Vih hawj vunz lai minzcuz vunz noix yawj denyingj gamjsouh engq

laegdaeuq, aendoih cuengq denyingj ciengzseiz senjaeu doenghgi denyingj, gohbujben yungh Vahcuengh boiq yaem ma cuengq.” Cwnq Yiconh boux boqyaem Vahcuengh Ningzmingz Yen Vwnzsinh Gvangjdengiz neix caeuq-faenh boiqyaem hawj 4 bouh yingiben gvaq. De lwnh gicej, banj Vahcuengh doengh benq denyingj 《Ra Liuz Sanhcej》《Aensingz Gadog Lwed Lae Rim》《Yaengx Fwngz Hwnjdaej》vunz lai maij yawj raixaix.

Seizneix gizdieg aendoih cuengq denyingj fugsah gaeng mbe daengz 29 aen mbanj (segi) 3 aen yangh cin henzguk. Veiz Gyangh lwnh gicej, geij bi neix daej, aendoih cuengq denyingj moix cuengq baez denyingj ndeu, cwngfuj couh bouj hawj 200 maenz cien. Gij cien cwngfuj bouj hawj haenx gihbwnj cungj yungh daej gya youz, co gvanghdez, coih ci doenghgi neix.

Aendoih cuengq denyingj sam beixnuengx ranz Veiz gveihmoz ngoenz hung gvaq ngoenz. Bi 2012 ndwen 9, aendoih cuengq denyingj Swlang caeuq Baicuzsoj Henzguk Swlang doxgap gaplaeb aendoih cuengq denyingj gyaез lwgminz souj maenh henzguk. Huz Yivaz boux gyaudaujyenz baicuzsoj neix naeuz, vih henho henzguk huzndei onj-dingh, gyoengqde ciengzseiz riengz aendoih cuengq denyingj haeu mbanj bae, senhconz gij cwngcwz aen dangj, gejgangj faplwd fapgi, doengzseiz miz cimdoi boqcuengq doenghgi senhconzben loh cianh, lumjbaenz 《Gij Cihsiz Bingzciengz Lajmbanj Re Yaeuhlox》《Gij Fuengfap Lajmbanj Re Gvaihjai Mehmbwk Lwgnyez》daengj.

Bi 2018 ndwen 8, Veiz Goh youq gwnz loh daj ndaw yienhsingz gaujbei yingiben dauqma bungzdaengz cihux naek, daengz seizneix lij caengz ndei liux. Veiz Goh naeuz, mboengq youq ndaw yihyen itcig miz vunz lai dwk denva cam: “Aen ga mwngz ndei caengz ne?” “Seizlawz dauqma cuengq denyingj?”……Siengj daengz gyoengq beixnuengx baenzneix maq-muengh bonjfaenh ndei dauq, Veiz Goh roxnyinh ok geijlai rengz lae geijlai hanh cungj di.

Seizneix, Veiz Goh daiq aen gasieng ndeu caeuq godaih, go'neih nem gyoengq bouxgagnyienh laebdaeb youq henzguk Cungguk Yeznanz haeu mbanj cuengq denyingj. “Seizneix soujgih, dennauj haujlai dieg cungj miz lo, hoeng doiq boux-geq, mehmbwk, lwgnyez lajmbanj henzguk daej gangj, yawj denyingj vanzlij dwg gij fuengsik guh'angq gyoengqde nanz ndaej. Dou aeu guh bouxcienzboq vwnzva roengzrag henzguk seizdaih moq, cijaeu vunz lai siengj yawj, couh itdingh genhceiz roengzbae.” Veiz Goh naeuz.

(Liuz Veij Cauz Yihmingz Cinz Singhsingh raiz Dahdingz hoiz)